

LATOUR VEYER

PE ANONS RWAYONM ZEOVA



LARTIK LETID

27 OKTOB-2 NOVANM

Eski ou konvenki
ki ou annan
laverite? Akoz?

PAZ 7 • KANTIY: 28, 107

3-9 NOVANM

Servi Bondye
fidelman malgre
“bokou soufrans”

PAZ 12 • KANTIY: 135, 133

10-16 NOVANM

Paran—Pran swen
avek ou zanfan

PAZ 17 • KANTIY: 88, 24

17-23 NOVANM

Dernyen lennmi
lanmor pou ganny
detri

PAZ 23 • KANTIY: 111, 109

24-30 NOVANM

Rapel bann dan
servis a plen tan

PAZ 28 • KANTIY: 95, 100





SRI LANKA

KOUVERTIR: De frer pe prese
avek en peser an Negombo
lo lakot dan was Sri Lanka

POPILASYON

20,860,000

PROKLANMATER

5,600

PIONYE ORDINER

641

OSI DAN SA NIMERO

3 Eski ou pe “swete” desarz
plis responsabilite dan
kongregasyon?

22 Kestyon lekter

LARTIK LETID

■ Eski ou konvenki ki ou annan laverite? Akoz ?

Sa lartik pou montre serten rezon akoz bokou dimoun i dir
ki Temwen Zeova i annan laverite. Nou pou osi vwar rezon
akoz bann Temwen i konvenki ki zot annan laverite.

■ Servi Bondye fidelman malgre “bokou soufrans”

Nou pou bezwen soufer akoz nou pe viv dan lemonn Satan.
Serten difikilite i parey bann latak direk lo nou lafwa, lezot i
bann latak anba anba. Sa lartik pou ed nou rekonnèt zot e
prepar nou pour bann latak Satan.

■ Paran—Pran swen avek ou zanfan

Paran i bezwen elve zot zanfan “dan en ledikasyon ek lens-
triksiyon [Zeova].” (Efe. 6:4) Sa lartik i diskite lo trwa fason ki
zot kapab fer sa e azir konman bann berze spirityel anver
zot zanfan ki pe grandi.

■ Deryen lennmi lanmor pou ganny detri

Ki mannyer lanmor ti antre dan lafanmir imen? Ki mannyer
sa ‘deryen lennmi lanmor pou ganny detri’? (1 Kor. 15:26)
Vwar ki mannyer sa larepons i montre lazistis Zeova, son
lasazes e sirtou son lanmour.

■ Rapel bann dan servis a plen tan

Zeova in toultan annan bann serviter fidel ki servi li a plen
tan menm si i difisil pour fer li dan sa lemonn. Ki nou kapab
fer pour “rapel . . . ki mannyer zot in pratik zot lafwa e akon-
pli en travay lanmour”?—1 Tesa. 1:3.

Eski ou pe “swete” desarz plis responsabilite dan kongregasyon?

FERNANDO* ti en pe per. De ansyen ti oule koz avek li an prive. Apre detrw vizit ki sirveyan rezyonal ti'n fer resaman, bann ansyen ti eksplik li kwa ki i ti bezwen fer pour kapab kalifye pour desarz plis responsabilite dan kongregasyon. Anmezir ki letan ti pase, Fernando ti konmans mazinen si en zour i ti pou ganny apwente konman en ansyen. Aprezan sirveyan rezyonal ti'n fek vizit kongregasyon ankore. Ki bann ansyen ti pou dir sa voyaz?

Fernando ti ekoute anmezir ki enn ant sa de ansyen ti koz avek li. Sa frer ti refer avek 1 Timote 3:1 e dir ki bann ansyen dan kongregasyon ti'n ganny enformen ki i ti'n ganny apwente konman ansyen. Fernando ti redres li lo son sez e demande, “Ki ou'n dir?” Sa ansyen ti repet sa ki i ti'n fek dir e i ti an-

nan en pti sourir lo figir Fernando. Apre sa, ler i ti ganny anonse dan kongregasyon ki i ti'n vin ansyen, i ti annan sourir lo figir tou dimoun dan lasal.

Eski i mal pour anvè desarz plis responsabilite dan kongregasyon? Pa ditou. Dapre 1 Timote 3:1, “si en dimoun i swete ganny plas dirizan [oubyen desarz plis responsabilite] dan [“kongregasyon,” NW], i dezir en fonksyon nob.” En kantite msye Kreyen i pran an konsiderasyon sa lankourazman e fer bann progre spirityel pour kalifye pour annan responsabilite dan kongregasyon. Sa in anmenn bon rezilta e sa plizyer milye ansyen ek asistan ministeryel i en benediksyon pour pep Bondye. Me vi ki plis dimoun ankore pe zwenn lorganizasyon, i annan en bezwen pour ki plis frer i devlop sa dezir pour desarz responsabilite dan kongregasyon. Ki sa pli bon fason pour fer sa? Eski sa bann ki anvè vin ansyen i bezwen enkyet lo sa size parey Fernando?

* Non dan sa lartik in ganny sanze.



KI I VEDIR “SWETE” POUR DESARZ PLIS RESPONSABILITE DAN KONGREGASYON?

Sa lekspresyon “swete” pour desarz plis responsabilite dan kongregasyon dan Labib i tradwir en verb Grek ki vedir annan sa gran dezir e osi progrese. Sa i kapab fer nou mazin en dimoun ki pe fer zefor pour esey kas en fri mir ki anpandan lo en pye fri. Me sa pa vedir vin anbisye pour ganny a tou pri en privelez dan kongregasyon. Akoz? Parski bi sa bann ki anvi servi konman ansyen i devret fer li pour desarz “en fonksyon nob” me pa pour rod pozisyon.

En bon pe sa bann kalifikasyon an rapor avek sa fonksyon nob i ganny mansyonnen dan 1 Timote 3: 2-7 ek Tit 1:5-9. En frer ki apel Raymond ki’n ansyen depi lontan, i dir sa konsernan bann standar o nivo: “Sa ki pli enportan pour mwan i sa ki nou ete. I enportan pour koz e ansenny byen, me sa pa pli enportan ki lefet ki en dimoun i devret san okenn repros, modere dan son labitid, annan bon zizman, ki son keksoz i annord, ki i rezonnab e kontan ofer lospitalite.”

En frer ki vreman anvi desarz plis responsabilite i montre ki i en dimoun ki napa okenn repros kont li par evit tou sort malonnekte ek lenpirte. I modere dan son labitid, i annan bon zizman, i byen organize e rezonnab, sa pou fer ki son bann frer ek ser i annan konfyans dan son gidans e ki i pou ed zot avek zot bann problemn. Lefet ki i kontan ofer lospitalite, i en sours lankourazman pour bann zenn ek bann ki nouvo dan laverite. I rekonfort e ed bann ki malad e aze akoz i en dimoun ki kontan fer sa ki byen. I develop sa bann kalite pour ed lezot me pa zis pour li ganny apwente konman ansyen.*

Konsej ansyen dan kongregasyon i kontan pour donn konsej ek lankourazman, me se bann ki anvi desarz responsabilite dan kongregasyon ki devret ranpli bann kalifikasyon ki dan Labib. Henry, en ansyen eksperyans i dir: “Si ou oule desarz plis responsabilite, travay dir pour montre ki ou kalifye.” I ti refer avek Eklezyast 9:10 e eksplike: “‘Tou sa ki ou lanmen i trouve pour fer, fer li avek tou ou lafors.’ Nenport ki responsabilite ki bann ansyen i donn ou, fer ou mye. Kontan tou travay ki ou gannyen pour fer

* Sa bann prensip ki ganny mansyonnen dan sa lartik i osi aplik pour sa bann ki anvi servi konman asistan ministeryel. Sa bann kalifikasyon ki zot devret annan i trouve dan 1 Timote 3: 8-10, 12, 13.



Anmezir ki ou “swete” desarz plis responsabilite dan kongregasyon partisip dan diferan fason dan aktivite kongregasyon



dan kongregasyon, enkli balye ater. Avek letan, ou travay ek ou zefor pou ganny rekonnet." Si ou anvi servi konman en ansyen en zour, fodre ou kontan travay dir e ki ou diny konfyans dan tou laspe ou servis sakre. Ou devret annan limilite, me pa en lanbi-syon egois.—Mat. 23:8-12.

REZET BANN MOVE FASON PANSE EK AKSYON

Serten frer i kapab ganny tante pour eksprim son dezir ki ti a kontan desarz plis responsabilite dan kongregasyon dan en fason endirek oubyen esey enfliyans konsey ansyen. Lezot pa kontan ler bann ansyen i konsey zot. Alor, zot kapab demann zot lekor, 'Eski mon anvi servi mon prop lentere oubyen mon anvi pran swen avek mouton Zeova avek limilite?'

Bann frer ki anvi desarz plis responsabilite pa devret oubliy en lot kalifikasyon ki bann ansyen i devret annan, sa i pour "vin en model pour troupo." (1 Pyer 5:1-3) En dimoun ki kit en bon legzanp pour kongregasyon i devret evite annan bann move panse ek aksyon. I devlop landirans ki swa i ganny apwente oubyen non. I pa aköz en frer i vin ansyen ki sa i fer li nepli annan defo. (Nom. 12:3; Ps. 106: 32, 33) I kapab osi ki en frer i panse ki napa okenn repros kont li, me lezot i kapab annan serten rezon pour pans diferaman lo li. (1 Kor. 4:4) Alor, si bann ansyen i ofer ou konsey senser baze lo Labib, fer ou mye pour ekoute san ki sa i agas ou. Apre fer zefor pour aplik sa bann konsey ki ou'n gannyen.

ME SI I FER LONTAN KI OU PE ESPERE?

Pour serten frer, i paret konmsi i pran bokou letan avan ki zot ganny apwente konman ansyen. Si i fer en bon pe lannen depi ki ou swete vin ansyen, eski par ler ou enkyet? Si i leka, pran an konsiderasyon sa parol enspire: "Kan en keksoz ki ou pe ekspekte pa arive, sa i fer ou leker malad, me ler sa ki ou anvi i ganny realize sa i en pye lavi."—Prov. 13:12.

Ler en dimoun i annan bann lobzektif ki i pa arive atenn, sa i kapab fer li dekouraze. Abraam ti santi koumsa. Zeova ti promet Abraam en garson, me en kantite lannen ti pase e zot de Sara zot pa ti ganny okenn zanfan. (Zen. 12:1-3, 7) Ler i ti annan en bon laz, Abraam ti sipliye: "Souvren Senyer Zeova, ki ou pou donn mwan, vi ki ou vwar ki mon pa ankor ganny zanfan . . . Ou pa'n donn mwan okenn

desandans." Zeova ti reasir li ki Son promes konsernan en garson ti pou vin vre. Me i ti pas ankor omwen 14 an avan ki Bondye ti akonpli son parol.—Zen. 15:2-4; 16:16; 21:5.

Anmezir ki i ti pe espere, eski Abraam ti perdi son lazwa pour servi Zeova? Non. I pa ti zanmen dout promes Bondye. I ti kontinyen espere ki sa zoli promes i ganny akonplir. Zapot Pol ti ekrir: "Apre ki i ti'n esper avek pasyans, Abraam ti resevwar sa ki Bondye ti'n promet li." (Ebr. 6:15) A lafen, Bondye Tou Pwisan ti beni sa zonn fidel plis ki sa ki i ti pe ekspekte. Ki nou kapab aprann avek Abraam?

Si ou ti a kontan servi konman en ansyen me sa pa ankor arive malgre bann lannen ki'n pase, kontinyen annan konfyans dan Zeova. Pa perdi ou lazwa dan son servis. Warren, ki'n ed bokou frer pour fer progre spirityel i eksplike aköz: "I pran letan avan ki i evidan ki en dimoun i kalifye pour ganny apwente

Valer bon kominikasyon

En frer ki pe "swete" desarz plis responsabilite dan kongregasyon oubyen ganny lezot privez dan lorganizasyon Zeova i apresye ler lezot i felisit li. (1 Tim. 3:1) Kan bann ansyen i donn konsey ek koreksyon ki kler e zantiy, zot parol i kapab fer "leker [sa frer] kontan." Souvandfwa sa enn ki ganny sa tel latansyon i kapab remark ladouser dan sa parol ki i pe dir. I pou anvi aksepte sa led spirityel e met li an pratik.—Prov. 27:9.

Me par ler latitud en dimoun i kapab fer lezot ezite pour ofer konsey dapre Labib. Philip i rapel ki pour plizyer lannen son aksyon ti montre kongregasyon ki i pa ti anvi plis responsabilite. Ler i ti sanz son fason panse i ti esey "rod konnesans" e demann bann ansyen zot gidans. I dir: "Bann frer ti donn mwan bann bon konsey pratik." Philip ti met an pratik sa konsey. Aprezan i pe servi konman en ansyen.—Prov. 18:15.

konman ansyen. Avek letan, abilite ek latitud en frer i ganny revele pitapti par lafason ki i konport li e desarz son bann responsabilite. Serten i krwar ki zot reisi zis ler zot ganny responsabilite oubyen zot ganny apwente konman ansyen. I mal si en frer i mazin koumsa e finalman sa frer i kapab devlop sa tandans pour mazin zis sanmenm. Si ou servi Zeova fidelman nenport landrwa kot ou ete e nenport keksoz ki ou fer, ou deza pe reisi.”

En frer ti esper pour plis ki di-z-an avan ki i ti ganny apwente ansyen. I refer avek vizyon dan liv Ezekeyel sapit 1 e i rakont sa lesan ki i’n aprann: “Zeova i kondwir son saret, setadir son lorganizasyon sa vites ki li i swazir. Sa ki enportan se ki keksoz i ganny fer dapre program Zeova me pa dapre sa ki pour nou. An sa ki konsern servi konman en ansyen, pa mwan ki pli enportan, setadir sa ki mon anv i oubyen sa ki mon kapab fer. Sa ki mon anv i kapab pa sa ki Zeova i konnen mon bezwen.”

Si ou anv fer sa travay nob konman en ansyen en zour, fer zefor pour donn lanmen fer kongregasyon ere. Si par ler letan i paret tarde pase, pa enkyet oubyen perdi pasyans. Raymond ki nou’n mansyonnen pli boner, i dir: “Lanbisyon i lennmi lakontantman. Bann dimoun ki toultan pe enkyet pa arive resanti sa lazwa ki nou gannyen ler nou servi Zeova.” Devlop

pli plennman fri lespri Bondye, sirtou pasyans. Fer zefor pour devlop ou spiritalite atraver letid Labib. Partisip plis dan predikasyon e etidye Labib avek bann dimoun ki enterese. Pran ou responsabilite pour fer bann aktivite spirityel avek ou fanmir e osi Ladorasyon Fanmir. Apresye sak loportinite ki ou pase avek ou bann frer ek ser. Anmezir ki ou pe fer progre pour atenn ou bann lobzektif, ou pou apresye sa ki ou fer dan servis Zeova.

Travay dir pour kalifye pour desarz responsabilite dan kongregasyon i en benediksyon sorti kot Zeova, ni li ni son lorganizasyon i anv ki bann frer ki oule desarz responsabilite i vin fristre e malere dan son servis. Bondye i siport e beni tou bann ki servi li avek en bon motivasyon. Parey i vre pour tou benediksyon, “i pa azout okenn douler avek.” —Prov. 10:22.

Menm si i fer en pe letan depi ki ou anv desarz plis responsabilite dan kongregasyon, ou ankor kapab fer bann bon progre spirityel. Anmezir ki ou pe devlop bann kalite nesese, travay dir dan kongregasyon e pa neglig ou fanmir, alor ou pou akimil bann lannen servis ki pa pou zanmen ganny oubliye par Zeova. Ki ou touzour trouv plezir pour servi Zeova dan nenport responsabilite ki ou ganny demande pour fer.





Eski ou konvenki ki ou annan laverite? Akoz?

“Konpran lavolonte Bondye: Sa ki bon, sa ki fer li plezir, sa ki parfe.”—ROM. 12:2.

ESKI i lavolonte Bondye ki bann vre Kreyen i al lager e touy dimoun ki annan en diferan nasyonalite? Sanmenm ki'n souvandfwa arive diran sa dernyen 100 an par bokou dimoun ki ti konsider zot menm konman Kreyen. Bann lomonye Katolik in beni larme ek zot zarm dan lager kont lezot Katolik sorti dan en lot nasyon. Sa in osi leka pour bann lomonye Protestan. Dezyenm Lager Mondyal i en legzanp tipik bann versman disan ki'n arive apre ki bann lomonye in beni larme.

² Ki bann Temwen Zeova ti fer pandan sa letan lager? Lis-twar i montre ki zot pa ti pran okenn kote. Akoz? I ti prensipalman akoz legzanp ek lansennyman Zezi. I ti dir: “Dimoun pou war ki zot mon bann disip si zot kontan kanmarad.” (Zan 13:35) Zot ti osi pran aker e aplik bann prensip ki zapot Pol ti ekrir bann Kreyen Korent.—**Lir 2 Korentyen 10:3, 4.**

³ Alor bann vre Kreyen ki zot konsyans in ganny formen

1. Ki mannyer bann sef relizye ti reazir pandan letan lager?
- 2, 3. Ki ti pozisyon bann Temwen Zeova pandan Dezyenm Lager Mondyal e pli tar e akoz?

KI OU POU REPONN?

Akoz kondwit bann Temwen Zeova pandan letan lager in enpresyonn bokou dimoun?

Kwa ki konvenk bokou dimoun konsernan nou travay predikasyon ki nou bann vre Kreyen?

Akoz ou konvenki ki ou annan laverite?

dapre Labib, nepli aprann oubyen pran par dan lager. Plizyer milye Temwen, zenn konman vye, msye konman madanm in ganny persekute parski zot pa partisip dan lager. Bokou in soufer dan bann prizon e dan bann kan kot zot in ganny forse pour fer bann travay dir. Pandan lepok Nazi Lalmanny serten ti menm ganny touye. Menm si bann Temwen Lerop ti fer fas avek persekiyon kriyel, zot pa ti zanmen oubliy zot responsabilite pour pres sa bon nouvel konsernan Rwayonm Zeova. Zot ti fer sa fidelman dan prizon, dan bann kan konsantrasyon e an egzil.* Pli tar, bann Temwen pa ti partisip dan zenosid Rwannnda an 1994. Zot osi pa ti pran okenn kote dan sa lager ki ti diviz an-syen Yougoslavya.

⁴ Lefet ki bann Temwen Zeova pa zanmen pran okenn kote dan lager, sa in konvenk plizyer milye dimoun dan lemonn ki bann Temwen i demontre lanmour senser pour Bondye ek zot prosen. Andotmo, zot demontre ki zot bann vre Kreyen. Par kont, i annan lezot laspe nou ladorasyon ki'n konvenk bokou ki bann Temwen Zeova i bann vre Kreyen.

SA PLI GRAN TRAVAY EDIKASYONNEL DAN LISTWAR

⁵ Depi konmansman minister Zezi, i ti met lanfaz lo lenportans pour anons sa bon nouvel Rwayonm Bondye. I ti swazir 12 disip pour konmans sa travay predikasyon ki ti pou ganny fer dan lemonn antye e apre i ti form en group

* Vwar liv *Jehovah's Witnesses—Proclaimers of God's Kingdom*, paz 191-198, 448-454 an Angle.

4. Lefet ki bann Temwen Zeova pa pran okenn kote dan lager, ki lefe sa in annan lo lezot?

5. Ki sanzman bann premye disip Kris ti bezwen pas atraver?

70 disip. (Lik 6:13; 10:1, NW) Zot ti ganny formen premyerman pour pres bon nouvel avek bann Zwif. Me apre, i ti annan en sirpriz. Bann disip Zezi ti ganny demande pour anons bonn nouvel avek bann dimoun dan lezot nasyon. Pa sa ti bezwen en gran sanzman pour bann disip Zwif ki ti devoue!—Akt 1:8.


⁶ Zapot Pyer ti ganny anvoye kot lakour Korney, en non Zwif. Sa ti fer Pyer rekonnet ki Bondye pa fer lapliferans. Korney avek son fanmir ti batize. Larelizyon Kreyen ti pe progrese dan en nouvo teritwar ki pli gran, setadir dimoun dan tou nasyon ti kapab tann e aksepte laverite. (Akt 10:9-48) Aprezan teritwar ti lemonn antye.

⁷ Pandan listwar Temwen Zeova dan nou letan, bann ki pe desarz bann responsabilite in met bokou lanfaz avek devouman lo predikasyon ek lansennyman sa bon nouvel dan lemonn antye. Ozordi, preski wit milyon Temwen devoue pe fer zot mye pour anons mesaz Kris dan plis ki 600 langaz e pou annan plis langaz ankor. Bann Temwen Zeova i ganny idantifye par zot predikasyon portanport e pres lo semen, par fwa zot met bann piblikasyon lo latab oubyen servi prezantwar.

⁸ Plis ki 2,900 tradikter in ganny formasyon spesyal pour tradwir Labib ek bann piblikasyon baze lo Labib. Zot pa zis tradwir dan bann langaz ki ganny konsidere konman bann langaz pli koni. Zot fer zefor pour tradwir plizyer santenn langaz ki pa popiler me ki kantmenm ganny koze par plizyer

6. Ki mannyer Pyer ti rekonnet ki Zeova pa fer lapliferans?

7, 8. Ki linisyativ lorganizasyon Zeova in pran? (Vwar portre lo paz 7.)



Lekip tradiksyon pe prepar bann publikasyon dan langaz Low German
(Vwar paragraf 10)

milyon dimoun. Par egzanp, Lespanny plizyer milyon Catalanian i koz zot langaz natal Catalan tou le zour. Pa bokou letan pase, dimoun in rekonmans koz langaz Catalan dan diferan fason dan bann landrwa parey Andorra, Alicante, bann zil Balearic ek Valencia. Aprezan bann Temwen Zeova i prodwir bann publikasyon baze lo Labib dan langaz Catalan e bann renyon pe ganny fer dan en langaz ki tous leker pep Catalanian.

⁹ Sa menm travay pour tradwir bann publikasyon baze lo Labib e ansenny dimoun dan zot prop langaz pe ganny fer dan lemond antye. Par egzanp, Meksik laplipar dimoun i koz Espanyol me bokou dimoun laba i koz en lot langaz dan lakour. Maya i enn sa langaz. Biro brans Meksik in fer lekip tradiksyon Maya reste dan en parti sa pei kot zot kapab koz e ekout sa langaz tou le zour. En lot legzanp se langaz Nepali ki zot koze Nepal, kot i annan plis ki 29 milyon zabit. Dan sa pei zot koz apepre 120 langaz, me plis ki dis milyon i koz langaz Nepali e bokou lezot i servi li kon-

man en dezyenm langaz. Nou osi prodwir publikasyon baze lo Labib dan sa langaz.

¹⁰ Lorganizasyon Zeova i pran sa komann pour pres sa bon nouvel Rwayonm dan lemond antye seryezman, parey nou vwar atraver sipor ki bann lekip tradiksyon dan lemond i donnen. Plizyer milyon trak, brosir ek magazin in ganny distribye gratwitman pandan bann kanpanny ki'n ganny fer dan lemond antye. Sa depans i ganny kouver par bann donasyon ki bann Temwen Zeova in fer volonterman an swivan lenstriksyon Zezi: "Zot in resevwar pour nanryen alor donn osi pour nanryen."—Mat. 10:8.

¹¹ Konman bann predikater ek ansenyan Kretyen ki devoue, bann Temwen Zeova i sitan konvenki ki zot in vwar laverite ki zot fer bann gran sakrifis pour ki zot kapab partaz sa mesaz avek pep bann lezot nasyon ek group etnik. Bokou in senplifye zot lavi, aprann en lot langaz e adapte avek en

9, 10. Kwa ki montre ki lorganizasyon Bondye i entereze avek bezwen sipriyel tou dimoun?

11, 12. Ki mannyer sa travay predikasyon mondyal ki ganny fer par bann Temwen Zeova in annan en bon lefe lo lezot?



Bann piblikasyon dan langaz Low German i itil Paragway
(Vwar portre lo paz 7)

nouvo kiltir pour zot kapab partisip dan sa travay Kreyen ki vreman enportan. Sa travay predikasyon ek lansennyman enternasyonal i en lot rezon ki konvenk bokou dimoun ki bann Temwen Zeova i bann vre disip Zezi Kri.

¹² Bann Temwen i fer tousala akoz zot konvenki ki zot in trouv laverite. Me kwa ankor ki'n konvenk plizyer milyon dimoun ki bann Temwen Zeova i annan laverite?—**Lir Romen 14:17, 18.**

REZON KI ZOT KRWAR

¹³ Nou kapab benefisyé avek koman-ter bann Kreyen devoue dan nou letan ki konvenki ki zot annan laverite. En frer ki'n servi Zeova pour en bon pe letan ti eksprim son santiman sa fason: "Tou zefor i ganny fer pour gard lorganizasyon Zeova prop e sen moralman. Sa i aplik pour nenport ki ki bezwen ganny konsey oubyen disiplin." Ki mannyer pep Zeova i gard sa standar o nivo?

13. Ki mannyer bann Temwen in gard lorganizasyon prop?

Par swiv bann standar dan Parol Bondye e model ki Zezi ek son bann disip in kite. Alor, pandan listwar bann Temwen Zeova dan nou letan, konpare avek lamazorite zis en ptigin ki'n bezwen ganny ekskli dan kongregasyon akoz zot pa ti oule swiv standar Bondye. Lamazorite i gard en lavi pir ki en bon legzanp, sa i enkli bann ki avan ti viv dan en fason ki Bondye pa ti aprouve me ki'n sanze.—**Lir 1 Korentyen 6:9-11.**

¹⁴ Me ki'n arive avek bann ki'n bezwen ganny tire dan kongregasyon an swivan gidans Labib? Plizyer milye in repantir e rezet bann aksyon ki kont prensip Bondye e zot in retourn dan kongregasyon. (**Lir 2 Korentyen 2:6-8.**) Par swiv standar Labib konsernan nou kondwit, sa in fer ki kongregasyon Kreyen i prop e diny konfyans. Lefet ki Temwen Zeova i swiv standar Bondye, kontrerman avek lezot larelizyon ki les bann dimoun dan zot legliz fer sa ki zot anvi, sa in konvenk bokou ki sa i en pep ki pratik laverite.

¹⁵ Akoz lezot Temwen eksperyanse i krwar ki zot in trouv laverite? En frer dan son 50 an ti eksplike: "Depi mon ladolesans mon lafwa i baze lo trwa pilye oubyen lansennyman enportan: (1) ki Bondye i egziste, (2) ki i ti enspir Labib e (3) ki i pe servi e pe beni kongregasyon Kreyen bann Temwen Zeova ozordi. Anmezir ki mon'n etidye diran bann lannen, mon'n toultan esey teste sa bann pilye e demann mon lekor si vreman zot baze lo en fondasyon solid. Pour sak sa bann pilye, levidans in ogmant en kantite lannen apre lannen e

14. Ki bokou dimoun ki'n ganny ekskli in fer e avek ki rezilta?

15. Kwa ki ti konvenk en frer ki i annan laverite?

sa in fortifye mon lafwa ek konviksyon ki nou vreman annan laverite.”

¹⁶ En ser ki’n marye ki pe servi dan biro prensipal New York ti dir sa konsernan lorganizasyon Zeova: “I sa sel [lorganizasyon] ki determinen pour anons non Zeova. Pa sa i fer sans ler nou rapel ki sa non divin i aparet aperepre 7,000 fwa dan Labib! Mon apresye sa lankourazman dan 2 Kronik 16:9: ‘Lizye Zeova pe get partou lo later pour vwar bann ki zot leker i tou pour li, pour li donn zot son lafors.’” I kontinyen par dir: “Laverite in montre mwan ki mannyer pour annan en leker konplet pour ki Zeova i kapab donn mon son lafors. Mon relasyon avek Zeova i pli presye pour mwan. Mon osi apresye rol Zezi ki donn en bon konnesans lo Bondye ki soutenir mwan.”

¹⁷ En msye ki pa ti krwar dan Bondye ti admet: “Kreasyon i konvenk mwan ki Bondye i anvi limanite i rezouir lavi e alor i pa pou permet ki soufrans i kontinyen pour touzour. An plis, anmezir ki lemond i vin deplizanpli move, lafwa, devouman ek lanmour pep Zeova pe vin pli for. Zis lespri sen Zeova ki kapab fer sa mirak dan nou letan.”—**Lir 1 Pyer 4:1-4.**

¹⁸ En lot frer ki’n Temwen pour en bon pe letan ti donn son rezon pour krwar sa laverite ki nou prese: “Mon letid diran bann lannen in konvenk mwan ki bann Temwen in fer bann gran zefor pour swiv model bann Kretyen dan premye syek. Mon’n vwar pour mwan menm linite bann Temwen

16. Kwa ki ti enpresyon en ser konsernan laverite?

17. Ki konviksyon en msye ki pa ti krwar dan Bondye i annan e akoz?

18. Ki mannyer ou santi an rapor avek sa ki de frer ti dir?

Zeova dan lemond antye anmezir ki mon’n vwayaz en pe partou dan lemond. Laverite dan Labib in donn mwan satisfaksyon e fer mon ere.” Ler en frer ki ti dan son 60 an an montan ti ganny demande akoz i ti konvenki ki i ti’n trouv laverite, i ti met lanfaz lo Zezi Kri e eksplike: “Nou’n byen etidye lavi ek minister Zezi e nou’n arive apresye son legzanp. Nou’n fer bann sanzman dan nou fason viv pour nou kapab apros pli pre avek Bondye atraver Kris Zezi. Nou’n rekonnet sakrifis Zezi konman baz pour nou delivrans. Nou osi konnen ki i ti ganny resisite. Nou annan temwannayaz ki diny konfyans konm kwa ti annan bann temwen ki ti vwar sa.”—**Lir 1 Korentyen 15:3-8.**

KI NOU DEVRET FER AVEK LAVERITE?

¹⁹ Konman bann Kretyen ki kontan zot prosen, nou pa kapab gard nou konnesans lo laverite ki presye zis pour nou menm. Pol ti rezonn avek son bann frer dan kongregasyon Ronm: “Si par ou labous ou dir devan tou dimoun ki Zezi i limenm Senyer, e si ou kwar dan ou leker ki Bondye in resisit li parmi bann mor, ou pou ganny sove. Parski, dimoun ki kwar dan son leker, i ganny zistifye, e sa ki anons avek son labous pou ganny sove.”—Rom. 10:9, 10.

²⁰ Konman Temwen Zeova, nou konvenki ki nou annan laverite e nou konnen ki privez nou annan pour ansenny lezot konsernan bon nouvel lo renny Rwayonm Bondye. Anmezir ki nou desarz nou responsabilite pour prese, nou anvi ki lezot i enpresyonnen pa zis avek sa ki nou ansennyen dan Labib me osi avek nou konviksyon.

19, 20. (a) Ki responsabilite Pol ti met lanfaz lo la avek kongregasyon Ronm? (b) Konman bann serviter Zeova, ki privez nou annan?



Servi Bondye fidelman malgre “bokou soufrans”

“[Nou] bezwen pas par bokou soufrans pour antre dan Rwayonn Bondye.”—AKT 14:22.

KI OU POU REPONN?

Lekel ki par deryer nou bann soufrans?

Ki mannyer nou kapab prepar nou pou fer fas avek persekisyon ek dekourazman?

Ki rekonpans bann ki andir soufrans pou gannyen?

ESKI i sok ou pour konnen ki ou kapab eksperyans “bokou soufrans” avan ou ganny lavi eternal? I tre probab ki non. Menm si ou fek konn laverite oubyen ou pe servi Zeova pour bokou letan, ou konnen ki difikilte i form par nou lavi dan lemonn Satan.—Rev. 12:12.

² Apard bann difikilte ki “arive normalman avek en dimoun,” setadir bann problem ki tou imen enparfe i pas atraver, bann Kreyen i fer fas avek en lot kalite soufrans. (1 Kor. 10:13) Ki kalite soufrans? Zot ganny bann persekisyon entans aköz zot reste ferm pour obeir lalwa Bondye. Zezi ti dir son bann disip: “Okenn serviter pa pli gran ki son met. Si zot in persekit mwan, zot osi, zot pou ganny persekite.” (Zan 15:20) Lekel ki par deryer sa bann lopozisyon? Se Satan. Labib i dekrir li konman “en lyon ki kriye” ki ‘pe rod [pep Bondye] pour devore.’ (1 Pyer 5:8) Satan pou servi nenport ki mwayen pour kas lentegrite bann disip Zezi. Annou vwar ki ti arive avek zapot Pol.

1. Aköz bann serviter Bondye pa soke ki zot kapab eksperyans soufrans?

2. (a) An plis ki bann problem ki bann imen enparfe i pas atraver, ki kalite soufrans bann Kreyen i fer fas avek? (Vwar portre anler.) (b) Lekel ki par deryer soufrans ki nou fer fas avek e ki mannyer nou konnen?

SOUFRANS DAN LAVIL LIS

³ Plizyer fwa Pol ti ganny persekute akoz son lafwa. (2 Kor. 11:23-27) Enn sa lensidan ti ariv dan lavil Lis. Apre ki i ti'n geri en zonn ki ti paralize depi nesans, Pol ek son konpanyon Barnabas ti ganny konsidere konman bann bondye. Tou le de ti bezwen sipliy sa lafoul pour pa ador zot. Me pa bokou letan apre, bann Zwif ki ti opoz zot ti vini, zot ti koz manti lo Pol ek Barnabas e bann dimoun ti krwar. En sel kou sityasyon ti sanze. Aprezan bann dimoun ti saboul Pol avek ros ziska ki zot ti krwar i'n mor.—Akt 14:8-19.

⁴ Apre ki Pol ek Barnabas ti'n vizit Derb, zot "ti retourn Lis, Ikonyonn ek Antyos-an-Pisidi. Zot ti fortifye leker bann krwayan e ankouraz zot pour reste ferm dan lafwa e ki zot bezwen pas par bokou soufrans pour antre dan Rwayonn Bondye." (Akt 14:21, 22) Premye kou, en parol koumsa i kapab paret drol. Apre tou, ler ou mazin pour pas dan "bokou soufrans," olye ankouraz ou sa i plito dekouraz ou. Alor, ki mannyer Pol ek Barnabas ti "fortifye leker bann krwayan" par dir zot ki zot ti pou pas atraver plis soufrans?

⁵ Nou kapab trouv larepons si nou egzamin byen sa parol ki Pol ti dir. I pa ti dir: "[Nou] bezwen *andir* bokou soufrans." O kontrè i ti dir: "[Nou] bezwen pas par bokou soufrans *pour antre dan Rwayonn Bondye*." Alor Pol ti fortifye bann disip par met lanfaz lo sa zoli rekonpans ki bann ki reste fidel pou gannnen. Sa rekonpans pa ti en rev. Anfet, Zezi ti dir: "Sa ki persevere ziska lafen *pou ganny sove*."—Mat. 10:22.

⁶ Si nou andire, nou pou ganny en re-

3-5. (a) Ki soufrans Pol ti pas atraver dan lavil Lis? (b) Dan ki fason son mesaz konsernan soufrans ti ankourazan?

6. Ki rekonpans bann ki andire pou gannnen?

konpans. Pour bann Kretyen swazir, sa rekonpans i lavi imortel dan lesyel konman bann ki pou diriz ansanm avek Zezi. Pour "lezot mouton" i lavi eternel lo later kot "pou annan lazistis." (Zan 10:16, NW; 2 Pyer 3:13) Me parey Pol ti fer resorti, antretan nou pou fer fas avek bokou soufrans. Annou vwar de kalite lobstak ki nou kapab rankontre.

BANN LATAK DIREK

⁷ Zezi ti predir: "Zot pou ganny arete e ganny anmennen devan tribinal. Zot pou ganny bate dan bann sinagog; zot pou debout devan bann dirizan pei ek bann lerwa." (Mark 13:9) Parey sa parol i montre, serten Kretyen pou soufer akoz zot pou ganny persekute fizikman, petet par ler akoz bann dirizan politik ek larelizyon. (Akt 5:27, 28) Ankor enn fwa, annou reflexir lo legzanp Pol. Eski i ti per ki i ti pou ganny persekute? Pa ditou.—**Lir Akt 20:22, 23.**

⁸ Pol ti brav e reste ferm kont bann latak direk Satan e i ti dir: "Mon pa atas okenn valer spesyal avek mon lavi, pourvi ki mon kapab akonpli mon misyon e fini sa travay ki Senyer Zezi in konfyè mwan, pour anons ["plennman sa bon nouvel konsernan," NW] lagras Bondye. (Akt 20:24) I kler ki Pol pa ti per ki i ti pou pas atraver persekisyon. O kontrè, i ti determinen pour andire nenport kwa ki i arive. Sa ki ti pli enportan pour li se pour anons "plennman sa bon nouvel" malgre nenport soufrans ki i ti kapab fer fas avek.

⁹ Ozordi, bokou nou bann frer ek ser in montre menm determinasyon. Par egzanzp, dan en pei serten Temwen i

7. Ki kalite soufrans ki kapab ganny dekrir konman bann latak direk?

8, 9. Ki mannyer Pol ti montre ki i ti determinen pour andire e ki mannyer serten denozour in montre menm determinasyon?

dan prizon pour preski 20 an akoz zot pa'n pran okenn kote dan politik. Zot ti ganny met dan prizon san ganny zize akoz dan sa pei ti napa okenn lalwa pour bann dimoun ki zot konsyans pa permet zot pran par dan lager. Dan prizon zot ti napa drwa ganny okenn viziter, ni menm zot fanmir, serten prizonnyen ti ganny bate e torture dan diferan fason.

⁴⁰ Nou bann frer dan lezot landrwa i andir soufrans ki ariv zot en sel kou. Si sa i ariv avek ou, pa bezwen per. Mazin Zozef. I ti ganny vann dan lesklavaz, me Zeova "ti delivre li dan tou son bann difikilte." (Akt 7:9, 10) Zeova i kapab fer parey pour ou. Pa zanmen bliye ki "Bondye i konnen ki mannyer i pou delivre bann dimoun ki atase avek li dan difikilte" oubyen soufrans. (2 Pyer 2:9) Eski ou pou kontinyen met konfyans dan Zeova, vi ki ou konnen i kapab delivre ou dan sa move lemond e permet ou ganny lavi eternal anba renny son Rwayonm? Ou annan rezon met konfyans dan li e pour fer fas avek persekisyon avek kouraz. —1 Pyer 5:8, 9.

BANN LATAK ANBA ANBA

¹¹ En lot kalite soufrans ki nou kapab fer fas avek i bann latak anba anba. Ki mannyer sa i diferan avek latak direk setadir persekisyon fizik? Latak direk i parey en siklonn ki frap en lavil e detri ou lakaz en sel kou. Bann latak anba anba i pli parey en group karya ki antre kot ou e dousman dousman manz striktir ou lakaz ki'n ganny fer avek dibwa ziska ki i grennen. Dapre sa dezyenm legzanp, en dimoun i kapab pa ni menm remark sa danze ziska in tro tar.

^{10.} Akoz nou pa devret per difikilte ki ariv en sel kou?

^{11.} Ki mannyer latak Satan anba anba i diferan avek son latak direk?

¹² Satan ti pou kontan detri ou relasyon avek Zeova, swa par servi bann latak direk, setadir persekisyon ouswa dousman dousman manz ou lafwa atraver bann latak anba anba. Enn parmi bann taktik anba anba byen efikas ki Satan i servi se dekourazman. Zapot Pol ti admet ki i ti santi li dekouraze par ler. (**Lir Romen 7:21-24.**) Akoz Pol, en zonn byen spirityel ki paret ti en manm lo konsey direkter dan premye syek ti apel son lekor "malere"? Pol ti dir ki i ti santi koumsa akoz son lenperfeksyon. I ti vremen anvi fer sa ki byen, me i ti santi en lot lafors ki ti pe anpes li. Si par ler ou bezwen lalit avek sa kalite santiman, pa ou vwar li ankourazan pour konnen ki menm zapot Pol ti fer fas avek menm difikilte?

¹³ Par ler, bokou frer ek ser i santi zot dekouraze, enkyet e menm santi ki zot pa vo nanryen. Par egzanp, en pionye devoue ki nou pou apel li Deborah i dir: "Mon mazin lo fot ki mon'n fer zanmen fini e sak fwa mon mazin lo la, mon santi mwan pli dekouraze. Kan mon mazin lo tou sa keksoz mal ki mon'n fer, annandler sa i fer mwan santi ki personn pa pou zanmen kapab kontan mwan, ni menm Zeova."

¹⁴ Kwa ki fer serten serviter Zeova ki devoue, parey Deborah dekouraze? I kapab annan plizyer rezon. Serten i kapab senpleman annan sa tandans pour annan bann move lopinyon lo zot menm ek zot sirkonstans dan lavi. (Prov. 15:15) Lezot i kapab annan bann santiman negatif akoz zot problemm lasante ki afekte zot lemosyon. Nenport kwa ki son lakoz,

^{12.} (a) Nonm en taktik Satan anba anba e akoz i sitan efikas? (b) Ki mannyer Pol ti ganny afekte par dekourazman?

^{13, 14.} (a) Kwa ki fer serten serviter parmi pep Bondye dekouraze? (b) Lelkel ki anvi vwar nou lafwa degrengole e akoz?

nou bezwen mazine lekel ki anvi kapitaliz lo sa bann santiman. An realite, lekel ki anvi ki nou sitan dekouraze ziska ki nou aret servi Zeova? Lekel ki anvi ki ou santi sa menm kondannasyon ki *li menm* i pou gannyen? (Rev. 20:10) Byensir i pa lot ki Satan. An realite, ki swa atraver bann latak direk oubyen bann latak anba anba, bi Satan i touzour parey, setadir pour fer nou enkyet, diminyen nou devouman e fer nou abandonnen. Pa zanmen bliye, bann serviter Bondye i dan en lager spirityel.


¹⁵ Annou reste determinen pour pa abandonn sa lager. Reste konsantre lo sa rekompans. Pol ti ekrir bann Kreyen Korent: “Nou pa perdi kouraz. Menm si nou lekor pe dousman dousman ganny detri, lo kote spirityel nou pe ganny renouvle de zour an zour. Annefe, nou bann pti soufrans aktyel pe prepar pour nou en mas laglwar ki napa okenn konparezon.” —2 Kor. 4:16, 17.

PREPAR NOU LA KONMELA POUR BANN SOUFRANS

¹⁶ Parey nou’n vwar, Satan i annan plizyer “riz” ki i kapab servi. (Efe. 6:11) Sakenn parmi nou i bezwen swiv sa konsey dan 1 Pyer 5:9: “Reste ferm dan lafwa e reziste li.” Pour fer sa nou bezwen prepar nou lespri ek lekor pour antrenn nou *la konmela* pour fer sa ki byen. Annou pran en legzanp: En larme pou souvan pas par plizyer lantrennman sever en kanti- te letan avan menm ki en lager i deklare. I menm parey dan larme spirityel Zeova. Nou pa konnen ki kalite lager nou pou enplike ladan dan lavenir. Alor, pa i ti pou saz pour nou fer bann

15. Ki manyer nou kapab montre ki nou determinen pour pa les nou ganny anvair par dekourazman?

16. Akoz i enportan pour prepar nou *la konmela* pour bann soufrans?



Bann Kreyen, zenn konman aze i antrenn zot lekor pour defann zot lafwa (Vwar paragraf 16)

lantrennman enportan pandan letan ki nou plizoumwen dan lape? Pol ti ekrir bann Korentyen: “Kontinyen teste pour vwar si zot dan lafwa, kontinyen prouve sa ki zot ete.”—2 Kor. 13:5, NW.

¹⁷ En fason ki nou kapab pran akèr konsej ki Pol ti donnen anba lenspirasyon i pour egzamin nou lekòr seryezman. Demann ou lekòr sa bann kesyon: ‘Eski mon persevere dan lapriyer? Kan mon fer fas avek presyon ki mon ganyen avek lezot, eski mon obe Bondye plito ki zonn? Eski mon asiste renyon Kretyen regilyerman? Eski mon koz avek lardyes konsènan mon krwayans? Eski mon vremen esey sipòrt defo lezot parey lezot i sipòrt sa ki pour mwan? Eski mon soumet avek bann ansyen dan mon kongregasyon e bann ki pe pran swen avek bann kongregasyon partou dan lemonn?’

¹⁸ Remarke ki de parmi sa bann kesyon pe koz konsènan defann nou krwayans avek kouraz e fer fas avek presyon ki nou ganyen avek lezot. Bokou nou bann zenn i bezwen fer sa ler zot dan lekòl. Zot in bezwen aprann pour pa kanmi oubyen anbarase akòz zot krwayans. O kontrè, zot koz avek lardyes. I annan bann sizasyon dan nou bann magazin ki kapab ed zot dan sa domenn. Par egzanzp, *Awake!* Zilyet 2009 ti sizere ki si enn ou kanmarad lekòl i demann ou: “Akòz ou pa krwar dan evolasyon?” ou kapab dir: “Akòz mon *devret* krwar dan evolasyon? Menm bann syantis pa tonm dakòr lo la e zot sipoze bann eksper!” Paran, fer sir ou fer bann pti legzersis avek ou zanfan pour ki zot pare pour fer fas avek sa bann kalite presyon ki zot ganyen avek lezot kot lekòl.

17-19. (a) Dan ki fason nou kapab teste nou lekòr? (b) Ki mannyer bann zenn i kapab prepar zot pour defann zot lafwa kot lekòl?

¹⁹ I vre, i pa toultan fasil pour defann nou krwayans oubyen pour fer lezot keksoz ki Zeova i demann nou. Apre en la-zournen travay i kapab ki nou bezwen fors nou lekòr pour al renyon. I kapab difisil pour kit nou lili byen konfortab bomatèn pour al predikasyon. Me mazi-nen: Ler bann pli gro leprev i vini dan lavenir, ou pou dan en pli bon pozisyon pour fer fas avek zot si ou’n devlop en bon routin spirityel avan.

²⁰ Ki nou pou dir lo bann latak anba anba? Par egzanzp, ki mannyer nou kapab fer fas avek dekourazman? En fason pli efikas pour fer sa se pour medite lo ranson. Sanmenm sa ki zapot Pol ti fer. Par ler i ti santi li malere. Me i ti osi konnen ki Kris in mor pa pour bann dimoun parfe, me pour bann peser e Pol ti enn parmi. Anfet, i ti ekrir: “Mon viv . . . par lafwa [dan] Garson Bondye ki’n kontan *mwan* e ki’n donn son lavi pour *mwan*.” (Gal. 2:20) Wi, Pol ti aksepte sa ranson. I ti rekonnèt ki sa ranson ti aplik pour li personnelman.

²¹ Sa menm pwennvi, setadir vwar sa ranson konman en kado sorti kot Zeova pour ou *personnelman* i kapab ed ou en kantite. Sa pa vèdir ki en sel kou nou pou nepli dekouraze. A en serten pwen, petet serten parmi nou pou bezwen fer fas avek sa latak anba anba ziska nouvo lemonn. Me pa bliye: Se bann ki pa abandonnen ki pou ganny sa pri. Nou pli pre avek sa zour kan Rwayonm Bondye pou etabli lape e fer bann dimoun fidel vin parfe. Annou determinen pour antre dan sa Rwayonm, menm si nou bezwen pas atraver bokou soufrans.

20, 21. (a) Ki mannyer meditasyon lo ranson i kapab ed nou fer fas avek bann santiman negatif? (b) Ki nou devret determinen pour fer an rapor avek soufrans?



Paran Pran swen avek ou zanfan

“Ou devret konn byen ou troupò.”

—PROV. 27:23.

LAVI bann berze dan letan lontan Izrael ti difisil. Zot pa ti zis bezwen fer fas avek lasaler ek lafrese, me zot ti osi bezwen protez zot troupò kont bann predater, ki swa zannimo oubyen imen. Bann berze ti enspekte zot mouton regilyerman e tret bann ki ti malad oubyen ki ti’n ganny dimal. Zot ti donn latansyon spesyal bann pti mouton akòz zot ti delika e zot ti napa lafors ki en mouton ki’n vin adilt i annan. —Zen. 33:13.

² Dan serten laspe, bann paran Kretyen i parey en berze akòz zot bezwen demontre bann kalite ki enportan pour en berze annan. Zot annan sa responsabilite pour elve zot zanfan “dan en ledikasyon ek lenstriksyon [Zeova].” (Efe. 6:4) Eski sa i en latas fasil? Non! Zanfan i fer fas avek bann propagann ki Satan i promote e osi zot prop lenperfeksyon. (2 Tim. 2:22; 1 Zan 2:16) Si ou annan zanfan, ki mannyer ou kapab ed zot? Annou vwar trwa keksoz ki ou kapab fer pour pran swen avek ou zanfan, sa i konn zot, nour i zot e gid zot.

1, 2. (a) Ki serten responsabilite en berze Izrael ti annan? (b) Ki mannyer bann paran i parey bann berze?

KI OU POU REPONN?

Kwa ki enplike pour ki bann paran i parey bann berze?

Kwa ki kapab ed bann paran nour i zot zanfan spirityelman?

Ki bokou zenn in apresye konsernan Ladorasyon Fanmir?

KONN OU ZANFAN

³ En bon berze i egzamin byen sak mouton pour fer sir ki i an bonn sante. Dan en sans senbolik, ou kapab fer parey avek ou zanfan. Labib i dir: "Konn byen ou troupo." (Prov. 27:23) Pour fer sa, ou bezwen vwar sa ki ou zanfan pe fer, sa ki zot mazinen e santi. Ki mannyer ou kapab fer sa? Enn parmi bann meyer fason i pour koz regilyerman avek ou zanfan.

⁴ Serten paran in remarke ki komini-kasyon i pli difisil kan zot zanfan i vin adolesan, zot tant pour dekile e pa santi zot alez pour dir sa ki zot panse e santi. Si ou zanfan i santi koumsa ki ou kapab fer? Dan plas fors ou garson oubyen ou fiy pour fer bann gran konversasyon serye, esey profit bann moman detant pour koz avek zot. (Det. 6:6, 7) I kapab ki ou pou bezwen fer plis zefor pour fer keksoz ansanm. Ou kapab al marse avek zot, oubyen al marse dan loto, zwe en zwe, fer en pti louvraz ansanm kot lakaz. Dan sa bann moman detant, ou adolesan i kapab santi li alez e pli pare pour koz lo sa ki i panse e santi.

⁵ Me si kantmenm sa ou zanfan pa paret pare pour koze? Alor ou kapab esey en lot lapros. Par egzanp, dan plas demann ou fiy ki mannyer *son* lazournen in pase, ou kapab dir li ki mannyer ou ou'n pas *ou* lazournen. Apre sa i kapab santi li pli alez pour koz lo son lazournen. Pour konn lopinyon ou zanfan lo serten topik, pa poz bann kestyon ki konsern li direktman, me plito ki pe konsantre lo sa topik. Ou kapab de-

mann li ki mannyer enn son zanmi i santi lo sa size. Apre ou kapab demann li ki konsey i ti pou donn son zanmi.

⁶ Byensir, pour ou zanfan dir ou sa ki zot santi e panse, zot bezwen vwar ou konman enn ki toultan la e abordab. Kan paran i paret toultan tro okipe pour koze, zanfan i tant pour gard zot problem pour zot menm. Me ki mannyer ou kapab montre ki ou abordab? I enplik plis ki zis dir, "Ou kapab vin kot mwan nenport ler." Ou adolesan i bezwen santi ki ou pa pou inyor zot problem ni reazir an gran avek zot. Bokou paran i kit en bon legzanp dan sa domenn. Kayla ki annan 19 an i dir: "Mon kapab koz avek mon papa lo nenport kwa. I pa enteronp mwan e i pa ziz mwan, i zis ekoute. Apre sa i toultan donn mwan sa pli bon konsey."

⁷ Menm ler ou pe koz lo bann topik delika parey pwente, fer atansyon pour pa met tro bokou lanfaz lo bann konsey ki ou negligize pour ansenny ou zanfan sa pli *bon* fason pour reazir dan sa sityasyon. Par egzanp: Meton ou ti al restoran e dekouver ki sa lalis meni i zis averti ou konsernan *food poisoning*. I tre probab ou ti pou kit sa landrwa e rod en lot restoran. Ou zanfan i kapab reazir parey si zot vin kot ou pour rod konsey me lo meni i zis en lalis bann lavertisman serye. (**Lir Kolosyen 3:21.**) O kontrer, esey annan en pwennvi balanse. En zenn ser ki apel Emily i fer sa remark: "Ler mon paran i koz avek mwan lo pwente, zot pa fer sa paret en size negatif. Zot fer resorti sa lazwa ki ou gannyen ler ou pe aprann konn en dimoun

3. Ki i vedir pour paran "konn" zot zanfan?

4, 5. (a) Ki serten sizesyon pratik ki kapab ed zanfan pour koz avek zot paran lo sa ki zot santi e panse? (Vwar portre lo paz 17.) (b) Ki ou'n fer pour fer li pli fasil pour ou zanfan koz avek ou?

6. Ki i vedir pour toultan la e abordab?

7. (a) Konsernan bann topik parey pwente, ki pwennvi balanse en paran i merit annan? (b) Ki mannyer bann paran i kapab irit zot zanfan san realize?



Ekoute pour ki ou **KONN** zot
(Vwar paragraf 3-9)



NOURI zot byen
(Vwar paragraf 10-12)



GID zot lo zot semen
(Vwar paragraf 13-18)

e trouv en konzwen. Sa in ed mwan pour santi mwan konfortab pour koz avek zot lo la. Anfet, mon anvî enplik zot dan nenport relasyon ki mon annan dan plas kasyet li avek zot.”

⁸ Anliny avek sa ki Kayla ti dir, ou kapab montre ki ou en dimoun abordab par ekout ou zanfan avek pasyans. (**Lir Zak 1:19.**) En manman tousel ki apel Katia i admet: “Dan lepase mon ti vreman mank pasyans avek mon fiy. Mon pa ti les li fini dir sa ki i ti anvî dir. Swa mon ti tro fatigue pour ekoute oubyen mon pa ti anvî ki personn i fatig mwan. La ki mon’n sanz mon fason fer, mon fiy in sanze. I pli pare pour korpere.”

⁹ En papa ki apel Ronald in pas par menm leksperyans avek son fiy adolesan. I dir: “Kan i ti dir mon ki i kontan en garson kot lekol, o konmansman mon ti vreman ankoler. Me ler mon ti reflesir lo ki mannyer Zeova i pasyante e rezonnab avek son serviter, mon ti mazine ki i ti pou pli mye pour mwan donn mon fiy en sans pour eksprim son santiman avan ki mon esey koriz li. Pa

8, 9. (a) Ki byenfe nou kapab gannyen kan nou ekoute san enteronpe? (b) Ki bon rezilta ou’n gannyen kan ou ekout ou zanfan?

mon kontan ki mon ti fer sa! Pour premye fwa, mon ti konpran santiman mon fiy. Kan i ti fini, mon ti vwar li pli fasil pour koz avek li dan en fason ranpli avek lanmour. I ti sirprann mwan ki i ti pare pour aksepte mon konsej. I ti eksprim en dezir senser pour sanz son latitud.” Ler ou koz avek ou zanfan souvan, sa i ed ou pour konn pli byen sa ki zot panse e santi. An retour sa pou ed ou annan en pli gran lenfliyans lo bann desizyon ki zot fer dan lavi.*

NOURI OU ZANFAN

¹⁰ En bon berze i konnen ki nenport mouton i kapab elwannyen avek troupo. Petet i ganny atire par bann zerb ki pa tro lwen, apre bann en pti pe pli lwen e alor i separe avek troupo. Dan menm fason, en zanfan i kapab elwannyen pitapti lo en semen ki danzere pour son spirityalite e ganny tante par move frekantasyon oubyen bann divertisman degradan. (Prov. 13:20) Ki mannyer ou kapab ede pour anpes sa sityasyon devlope?

* Pour plis sizesyon, vwar *Latour Veyer* le 1 Out 2008 paz 10-12 an Angle.

10, 11. Ki mannyer ou kapab ed ou zanfan pour pa kit laverite?

¹¹ Kan ou pe ansenny ou zanfan, si ou remark son pwen feb, pa tarde pour azir. Ed ou zanfan pour ranforsi bann kalite Kreyen ki zot deza annan. (2 Pyer 1:5-8) Sa bon moman pour ou fer sa regilyerman i pandan Ladorasyon Fanmir. Pour eksplik sa laranzman, *Minister Rwayonn* Oktob 2008 ti dir: “Bann sef fanmir i ganny ankouraze pour desarz zot responsabilite devan Zeova pour fer sir ki en letid Labib o profon e regilye i ganny fer an fanmir.” Eski ou pe profit byen sa zoli provizyon pour pran swen avek ou zanfan? Annan konfyans ki ou zanfan i vremen apresye lefet ki ou priyorite i pour pran swen avek zot bezwen spirityel.—Mat. 5:3, NW; Fili. 1:10, NW.

¹² Annou vwar sa ki en adolesan ki apel Carissa i dir lo ki mannyer en program Ladorasyon Fanmir in benefisyé son fanmir. “Mon kontan ki nou tou nou kapab asiz ansanm e koze. Anmezir ki nou fer sa, nou pe vin pli pros e annan bann bon souvenir. Mon papa i regilyerman swiv nou program Ladorasyon Fanmir. I ankourazan pour vwar ki i pran li o serye e sa i fer mwan anvi fer parey. I osi donn mwan plis rezon pour respekte li konman mon papa e mon sef spirityel.” En zenn ser ki apel Brittney ti dir: “Ladorasyon Fanmir in fer mwan vin pli pros avek mon paran. I montre mwan ki zot anvi ekout mon problem e ki zot vremen enterese avek mwan. Sa i ed nou pour vin for e ini konman en fanmir.” I kler alor ki nouru ou zanfan spirityelman, espesyalman par Ladorasyon Fanmir, sa i en

12. (a) Ki mannyer bann zenn in benefisyé atraver en Ladorasyon Fanmir ki ganny fer regilyerman? (Enkli sa bwat “Zot apresye sa.”) (b) Ki mannyer ou’n personnelman benefisyé avek Ladorasyon Fanmir?

fason prensipal ki ou kapab vin en bon berze.*

GID OU ZANFAN

¹³ En bon berze i servi en baton pour gid e defann son troupo. Enn parmi son bann lobzektif prensipal i pour gid son mouton “kot i annan bon zerb.” (Ezek. 34:13, 14) Konman en paran, eski pa ou annan menm lobzektif spirityel? Ou anvi gid ou zanfan pour servi Zeova. Ou anvi ou zanfan i santi parey sa psalmis ki ti ekrir: “O mon Bondye, mon pran plezir pour fer ou lavolonte e ou lalwa i o profon dan mwan.” (Ps. 40:8) Bann zenn ki devlop sa kalite lapresyasyon pou dedye zot lavi avek Zeova e batize. I vre, zot devret fer sa desizyon kan zot ase matir e annan sa dezir senser pour servi Zeova.

¹⁴ Me ki arive si ou zanfan pa paret pe fer okenn progre spirityel, petet pe menm kestyon zot krwayans? Fer zefor pour kontinyen ansenny ou zanfan pour devlop lanmour pour Zeova e lapresyasyon pour tou sa ki i’n fer. (Rev. 4:11) Apre, ler zot dan en pozisyon pour fer li, zot pou kapab fer en desizyon personnel pour ador Bondye.

¹⁵ Me antretan, ki ou kapab fer si ou zanfan i konmans annan doutans? Ki mannyer ou kapab pran swen avek zot e ed zot pour vwar ki servi Zeova i vremen sa meyer fason viv ki pou fer zot zwaye? Esey konpran kwa ki fer zot annan doutans. Par egzanp, eski ou garson i vre-

* Pour plis lenformasyon vwar sa lartik “Ador Bondye an fanmir i enportan pour kapab sirviv!” dan *Latour Veyer* le 1 Oktob 2009 paz 29-31.

13. Ki mannyer en zanfan i kapab ganny motive pour servi Zeova?

14, 15. (a) Kwa ki devret bi bann paran Kreyen? (b) Akoz en adolesan i kapab annan dout konsernan vre ladorasyon?

man pa dakor avek bann lansennyman Labib, oubyen eski i zis napa ase konfyans pour defann son krwayans avek son bann kanmarad? Eski ou fiy i vreman annan en problemm avek lasazes lo bann standar Bondye oubyen eski i zis santi li tousel ouswa rezete par lezot?

¹⁶ Nenport ki rezon ou zanfan i annan doutans, ou kapab ed li fer zefor pour konpran e fer fas avek dout ki i annan lo bann kestyon spirityel. Ki mannyer ou kapab fer sa? En sizesyon ki bokou paran in vwar praktik e efikas i pour esey konn sa ki zot zanfan i panse par demande: “Ki mannyer ou santi lefet ki ou en Kreyen? Ki byenfe ou mazine ou gannye konman en Kreyen? Ki sakrifis i demande? Eski ou vwar ki bann byenfe ki nou gannye la konmela e bann ki’n ganny promet pour lavenir i plis ki bann sakrifis ki nou fer? Ki mannyer?” Byensir, ou devret demann sa bann kestyon dan ou prop mo e dan en fason zantiy ki demontre lentere, me pa zis saboul zot avek kestyon. Pandan sa konversasyon ou kapab diskite Mark 10: 29, 30. Serten zenn i kapab anvi ekrir sa ki zot panse. Par egzanp, lo en bout papye zot desin de kolonm, lo enn zot ekrir bann sakrifis e lo lot bann byenfe. Enn fwa ki ou avek ou zanfan zot in egzamin sa de kolonm ou kapab idantifye okenn problemm ki zot pe eksperyans e ed zot pour esey rod en solisyon. Si nou bezwen etidye sa liv *Ki Labib i dir ek “Lanmour Bondye”* avek bann ki entere-se, pa nou devret fer sa plis ankor avek nou prop zanfan! Eski ou pe fer li?

¹⁷ Avek letan, ou zanfan pou bezwen deside personnelman lekel ki zot pou servi. Pa mazine ki ou zanfan pou fer menm swa ki ou zis aköz ou’n fer li. Zot

16, 17. Dan ki fason bann paran i kapab ed zot zanfan pran laverite akere?

ZOT APRESYE SA

Reflesir lo sa de komanter onnet sa de zenn adilt ki’n kontan pour fer Ladorasyon Fanmir.

“Ladorasyon Fanmir i ed ou apros avek ou fanmir anmezir ki ou apros avek Zeova. Ou aprann en kantite lo ou menm e ou spirityalite. I ed ou realize kote ou bezwen amelyore.”

“Ladorasyon Fanmir i donn nou sa loportinite pour ekprim nou lekor dan en lanvironnman kalm. I en letan pour nou oubliy bann traka dan lavi tou le zour e konsantre lo nou spirityalite. A en serten moman, nou ti napa sa e la nou annan. Pa i en benediksyon!”

bezwen pran laverite akere. (Prov. 3:1, 2) Si i paret ki en zanfan i annan en problemm pour fer sa, aköz ou pa abord bann keksoz esansyel? Ed li pour rezonn lo bann kestyon parey: “Ki mannyer *mon* konnen ki Bondye i egziste? Kwa ki konvenk *mwan* ki Zeova i vreman apresye *mwan*? Aköz *mon* krwar ki bann standar Zeova i vreman pour *mon* prop dibyen?” Montre ki ou en bon berze par gid ou zanfan avek pasyans pour konvenk li ki fason Zeova i sa pli bon fason viv.*—Rom. 12:2.

¹⁸ Tou vre Kreyen i anvi imit sa Berze Siprenm. (Efe. 5:1; 1 Pyer 2:25) Bann paran an partikilye i bezwen konn byen zot troupo, setadir zot zanfan ki presye e fer tou sa ki zot kapab pour gid zot ver bann benediksyon ki Zeova i annan pour zot. Alor paran, dan tou fason ki ou kapab, pran swen avek ou zanfan par kontinyen elve zot dan semen laverite.

* Sa laspe i osi ganny diskite dan *Latour Veyer* le 1 Fevriye 2012 paz 18-21 an Angle.

18. Ki mannyer paran i kapab imit Zeova, sa Berze Siprenm?

Eski parol David dan Psonm 37:25 ek parol Zezi dan Matye 6:33 i vedir ki Zeova pa ti pou les en Kreyen mank manze?

■ David ti ekrir ki i pa ti'n "vwar okenn dimoun drwat ganny abandonnen, ni menm son bann zanfan pe rod dipen." Alor i ti koz an zeneral baze lo son prop leksperyans. I ti byen konnen ki Bondye i toultan pran swen avek son pep. (Ps. 37:25) Me parol David pa vedir ki napa en adorater ki'n deza mank sa ki i bezwen oubyen ki pou mank sa ki i bezwen.

I ti annan bann letan kot David li menm ti pas atraver bann difikilte. Enn sa moman ti ler i ti pe sov Sail. David ti napa bokou manze e i ti demann dipen pour li ek bann ki ti avek li. (1 Sam. 21:1-6) Alor dan sa ka, David ti "pe rod dipen." Par kont, dan sa sityasyon kritik i ti konnen ki Zeova pa ti'n abandonn li. An realite, napa okenn par kot nou lir ki David ti bezwen mandyan pour ganny manze pour sirviv.

Dan Matye 6:33 Zezi i donn nou lasirans ki Bondye pou pran swen avek bezwen son bann serviter fidel ki met lentere Rwayonm premye dan zot lavi. Zezi ti ankouraz nou pour "rod plito Rwayonm Bondye ek son lazistis, e limenm i a donn zot anplis tou lezot keksoz [enkli manze, keksoz pour bwar ek lenz] osi." Par kont, Zezi ti osi endike ki akoz persekasyon i kapab ki son "bann frer" pou lafen. (Mat. 25:35, 37, 40) Sanmenm ki ti arive avek zapot Pol. Par ler i ti lafen e swaf.—2 Kor. 11:27.

Zeova i dir nou ki nou pou ganny persekute dan plizyer fason. I kapab permet nou pour mank en serten keksoz anmezir ki nou ede pour reponn bann lakizasyon par Dyab. (Zob 2:3-5) Par egzanp, serten nou bann frer ek ser parey bann ki ti ganny mete dan bann kan konsantrasyon Nazi ti vwar zot an danze akoz perseki-



syon. Pour kas lentegrite bann Temwen zot ti esey en taktik kriyel, sa se pour pa donn zot ase manze. Bann Temwen fidel ti kontinyen obeir Zeova e i pa ti abandonn zot. I ti permet zot sibir sa leprev, zis parey i les tou bann Kreyen pas atraver diferan leprev. Par kont, napa okenn dout ki Zeova i siport tou bann ki soufer pour son non. (1 Kor. 10:13) Nou kapab gard antet sa parol dan Filipyen 1:29: "Zot in ganny privez pour servi Kris, pa zis pour krwar li, me osi pour soufer pour li."

Zeova i promet ki i pou avek son bann serviter. Par egzanp, Izai 54:17 i dir: "Napa okenn zarm ki ganny formen kont ou ki pou reisi." Sa promes ek lezot promes i garanti ki pep Bondye i ganny proteze konman en group. Me konman en endividi en Kreyen i kapab pas atraver bann leprev menm ziska kot i mor.



Dernyen lennmi lanmor pou ganny detri

“Dernyen lennmi ki pou ganny detri, se lanmor.”

–1 KOR. 15:26.

KAN Adan ek Ev ti ganny kree, zot ti napa okenn lennmi. Zot ti bann imen parfe e zot ti reste dan en paradi. Zot ti annan en bon relasyon avek zot Kreater konman son garson ek son fiy. (Zen. 2:7-9; Lik 3:38) Zot lespwar pour lavenir ti ganny endike dan sa lord ki Bondye ti donn zot. (**Lir Zenez 1:28.***) Pour ‘ranpli later e domin li,’ sa ti pou kapab ganny akonplir dan en serten kantite letan. Par kont, pour kontinyen ‘annan kontrol lo tou bann zannimo ki pe marse lo later’ Adan ek Ev ti pou bezwen viv pour touzour e Adan pa ti pou bezwen perdi son responsabilite akoz lanmor.

² Me akoz bann sityasyon i sitan diferan ozordi? Ki mannyer i annan sitan bokou lennmi ki anpes dimoun ere, ensi ki sa pli gran lennmi lanmor? Ki Bondye ti pou fer

* **Zenez 1:28:** “Apre, Bondye ti beni zot e Bondye ti dir zot: ‘Fer zanfan e vin bokou, ranpli later, domin li, annan kontrol lo bann pwason dan lanmer ek bann zwazo ki anvole dan lesyel ek tou zannimo ki pe marse lo later.’”

1, 2. Ki Adan ek Ev ti pas atraver o konmansman e ki kestyon sa i fer nou demande?

KI OU POU REPONN?

Ki lord ranpli avek lanmour Zeova ti donn Adan?

Ki mannyer lanmor in antre dan fanmir imen?

Kan ki ‘dernyen lennmi lanmor pou ganny detri’?

pour detri sa bann lennmi? Larepons sa bann kestyon ek lezot kestyon ki relye i kapab ganny trouve dan Labib. An-nou aprezan egzamin serten sa bann kestyon enportan dan Labib.

EN LAVERTISMAN RANPLI AVEK LANMOUR

³ Menm si Adan ek Ev ti annan sa lespwar pour viv pour touzour, zot pa ti imortel. Pour reste vivan zot ti bezwen respire, bwar, dormi e manze. Pli enportan ankor, zot lavi ti depan lo relasyon ki zot ti annan avek sa Enn ki ti'n donn zot lavi. (Det. 8:3) Pour zot kontinyen viv ere zot ti pou bezwen aksepté gidans Bondye. Zeova ti fer sa kler avek Adan menm avan ki i ti kree Ev. Ki mannyer i ti fer sa? "Zeova ti osi donn sa zonn sa lord: 'Fri dan tou pye dibwa sa zarden ou kapab manze ziska ou rasazyé. Me an sa ki konsern sa pye konnesans bon e move ou pa devret manze, parski sa zour ki ou manz son fri, sirman ou pou mor.'" —Zen. 2:16, 17.

⁴ "Sa pye konnesans bon e move" ti montre ki Bondye ti annan drwa pour deside kwa ki byen ek kwa ki mal. Byensir, Adan ti deza konn sa ki byen ek sa ki mal parski i ti ganny kree dan resanblans Bondye e i ti annan en konsyans. Sa pye ti pou endik Adan ek Ev ki zot ti pou toultan bezwen gidans Zeova. Si zot ti manz fri dan sa pye dibwa i ti pou konmsi zot ti pe pran responsabilite pour deside kwa ki byen ek kwa ki mal e sa ti pou annan en tre move konsekans lo zot ek zot desandans. Sa lord ki Bondye ti donner ek son santans ti montre gravite en tel fot.

3, 4. (a) Ki lord Bondye ti donn Adan ek Ev? (b) Akoz i ti enportan pour zot obeir sa lord?

LAFASON KI LANMOR TI ANTRE DAN FANMIIR IMEN

⁵ Apre ki Ev ti'n ganny kree, Adan ti koz avek li konsernan lord ki Bondye ti'n donner. I ti konn sa lord tre byen e i ti kapab repet li preski parker. (Zen. 3: 1-3) I ti fer sa avek en personnaz ki ti prezant son lekor konman en serpan, en kreatir pridan. Sa enn ki ti par der-yer sa serpan ti Satan oubyen Dyab, en garson spirityel Bondye ki ti'n les li devlop en dezir pour vin endepandan e ganny pouvwar. (Konpar Zak 1:14, 15.) Pour arive akonpli son move dezir i ti akiz Bondye konman en manter. I ti asir Ev ki si i rod son lendepandans i pa ti pou mor, me i ti pou vin parey Bondye. (Zen. 3:4, 5) Ev ki krwar li, i ti azir dan en fason endepandan par manz sa fri e i ti persyad Adan pour fer parey. (Zen. 3: 6, 17) Dyab ti'n koz manti. (**Lir 1 Timote 2:14.**) Kantmenm sa, Adan ti "ekout lavwa [son] madanm." Menm si sa serpan ti kapab paret en zanmi, Satan oubyen Dyab ti an realite en lennmi kriyel ki ti konn tre byen move konsekans sa mansonz ki i ti'n dir Ev.

⁶ Pour bann rezon personnel, tou le de Adan ek Ev ti rebel kont sa Enn ki ti'n donn zot lavi ek tou lezot keksoz ki zot ti annan. Byensir, Zeova ti konn tou sa ki ti'n arive. (1 Kron. 28:9; **lir Proverb 15:3.***) I ti'n permet sa trwa endividi ki ti enplike dan sa rebelyon pour montre ki mannyer zot ti santi anver li. Lefet ki Zeova i en Papa nou asire ki sa ti'n bezwen fer son lekor fermal. (Konpar Zenez 6:6.) Apre sa i ti bezwen azir

* Proverb 15:3: "Lizye Zeova i partou, pe sirvey bann ki move e bann ki bon."

5. Ki mannyer Adan ek Ev ti arive dezobeir?

6, 7. Ki mannyer Zeova ti rann zizman lo sa bann peser?

konman Ziz pour obeir e aplik son prop
parol ki i ti'n dir konsernan konsekans
ki zot move aksyon ti pou anmennen.

⁷ Bondye ti'n dir Adan: "Sa zour ki
ou manz son fri [sa pye konnesans bon
e move] sirman ou pou mor." I kapab ki
Adan ti'n konpran ki "sa zour" ti pou
en zour 24 erdtan. Apre ki i ti'n dezobeir
lord Bondye, i kapab ki i ti pe ekspek-
te ki Zeova i azir avan soley kouse
sa zour. "O moman ki pti labriz i soufle
pandan lazournen," Zeova ti vin kot sa
koup. (Zen. 3:8) Konman en Ziz ki
drwat, i ti avan tou ekout sa ki zot ti an-
nan pour dir. (Zen. 3:9-13) Apre sa, i ti
pas son santans lo sa bann peser. (Zen.
3:14-19) Si i ti'n egzekut zot deswit, son
plan pour Adan, Ev avek zot desandans
pa ti pou ganny realize. (Iza. 55:11)
Menm si i ti pas santans lanmor e ki
lefe pese ti konmans deswit, i ti permet
Adan ek Ev pour ganny zanfan ki ti pou
kapab benefisye avek lezot provizyon
ki I ti pou fer. Alor, dan lizye Bondye,
Adan ek Ev ti mor menm zour ki zot
ti'n fer pese e vi ki 1,000 an i konman
en zour pour Zeova, an realite zot ti
mor dan lespas en "zour."—2 Pyer 3:8.

⁸ Eski bann zanfan Adan ek Ev ti pou
ganny afekte par sa ki zot paran ti'n
fer? Wi. Romen 5:12 i eksplike: "Pese
in antre dan lemond par en sel zonn, e
pese in anmenn lanmor, e lanmor in
pas avek tou dimoun, parski tou di-
moun in konmet pese." Premye pour
mor ti en zonn fidel ki ti apel Abel.
(Zen. 4:8) Apre lezot desandans Adan
ti vin vye e mor. Eski zot ti erit pese ek
lanmor? Zapot Pol ti reponn: "Bokou
in vin peser par dezobeisans en sel
zonn." (Rom. 5:19) Pese ek lanmor ki

8, 9. Ki mannyer desandans Adan ti ganny
afekte par son pese? (Vwar portre lo paz 23.)

Adan in transmet in vin en lennmi ki li-
manite pa kapab evite. Menm si nou pa
konn egzaktman ki mannyer pese ek
lanmor ti ganny transmet avek desan-
dans Adan, nou kapab vwar son rezilta.

⁹ I apropiye ki Labib i refer avek
pese ek lanmor ki nou'n erite konman
"sa vwal dey ki pe kouvertou pep e sa
dra ki'n ganny fabrike pour kouvertou
nasyon." (Iza. 25:7) Parey sa dra oubyen
vwal dey ki pe kouvertou nasyon pa-
reyman napa okenn imen ki kapab
sape avek pese ek lanmor. Alor an realite
"tou dimoun i mor dan Adan."
(1 Kor. 15:22) Sa i fer nou demann
menm kekyon ki Pol ti demande: "Le-
kel ki pou delivre mwan avek sa lekor
lanmor?" Eski i ti annan en dimoun ki
ti pou kapab delivre li?—Rom. 7:24.

PESE EK LANMOR POU GANNY DETRI

¹⁰ Wi, Zeova ti kapab sov Pol. Deswit
apre ki Izai ti mansyonn "sa vwal dey,"
i ti ekrir: "I pou anval lanmor pour tou-
zour e Souvren Senyer Zeova pou eswiy
larm lo tou figur." (Iza. 25:8) Parey en
papa i tir en keksoz ki fer son bann zan-
fan soufer e eswiy larm dan zot lizye,
Zeova i pran plezir pour detri lanmor. I
annan en lot personnaz ki pou ed li fer
sa. Premye Korentyen 15:22 i dir: "Parey
tou dimoun i mor dan Adan, demenm
dan Kris tou pou reviv." Pareyman, apre
ki Pol ti demande "Lekel ki pou deli-
vre mwan avek sa lekor lanmor?" i

* Konsernan zefor ki bann syantis in fer pour eks-
plik kwa ki fer nou vyeyi e mor, liv *Insight on the
Scriptures* i dir: "Zot inyor lefet ki Kreater li menm ti
donn sa lalwa konsernan santans lanmor lo sa pre-
mye koup imen e bann imen pa vremen konpran ki
mannyer sa santans in ganny enplimante."—Volim 2
p. 247 an Angle ouswa paz 1147 an Franse.

10. (a) Ki serten verse Labib ki montre ki Zeova
pou detri lanmor? (b) Ki sa bann verse i mon-
tre nou konsernan Zeova ek son Garson?

ti kontinyen: “Gran mersi Bondye par Zezi-Kri nou Senyer!” (Rom. 7:25) I kler ki sa lanmour ki ti pou Bondye pou kree limanite pa ti’n diminyen akòz rebelyon Adan ek Ev. Sa enn ki ti ed Zeova pou donn lavi sa premye koup li osi i pa ti’n perdi son lafeksyon pou zot desandans. (Prov. 8:30, 31) Me ki mannyer zot ti pou ganny sove?

¹¹ Kan Adan ti komet pese, Zeova ti kondann li a mor. An rezilta sa, tou dimoun in erit lenperfeksyon ek lanmor. (Rom. 5:12, 16) Nou lir: “Par pese en sel zonn, tou dimoun in ganny kondannen.” (Rom. 5:18) Ki Zeova ti pou bezwen fer pou tir sa zizman kondannasyon san ki i inyor son prop standar? Nou trouv larepons dan parol Zezi: ‘Fis-de-Lonn in vin pour . . . donn son lavi konman pri pour liberasyon bokou dimoun.’ (Mat. 20:28) Premye lanz ki Zeova ti kree ti fer kler ki lefet ki i ti’n ne lo later konman en zonn parfe i ti pou sa “pri pour sov limanite,” setadir sa pri ki ti annan menm valer avek sa ki ti’n perdi. Ki mannyer sa ranson ti pou anmenn lazistis?—1 Tim. 2:5, 6.

¹² Konman en zonn parfe, Zezi ti annan menm lespwar ki Adan avan ki i ti fer pese. Zeova ti annan plan pour ranpli later avek desandans parfe *Adan*. Alor, akòz son gran lanmour ki i ti annan pour son Papa ek desandans Adan, Zezi ti donn son lavi konman en sakrifis. Wi, Zezi ti donn en lavi parfe ki ti annan menm valer avek sa ki Adan ti’n perdi. Apre sa, Zeova ti resisit son Garson konman en lespri. (1 Pyer 3:18) Zeova ti annan tou rezon pour aksepte sa sakrifis ki *sa zonn parfe Zezi* ti ofer konman ranson oubyen pri pour reaste de-

11. Ki provizyon Zeova ti fer pour ed limanite?

12. Ki sa ranson ki ti demontre lazistis Zeova?

sandans Adan e donn zot sa lespwar ki Adan ti’n perdi. Dan en sans Zezi ti pran plas Adan. Pol ti eksplike: “I’n ganny ekri, ‘Premye zonn, Adan, ti vin en et vivan.’ Derynen Adan in vin en lespri ki donn lavi.”—1 Kor. 15:45.

¹³ A lafen defen sa zour pou arive kot “derynen Adan” pou azir konman “en lespri ki donn lavi” anver tou limanite. Lamazorite desandans Adan pou ganny resisite. Akòz? Parski zot in deza viv e zot in mor. Zot pou bezwen ganny resisite, setadir zot pou reganny lavi lo later.—Zan 5:28, 29.

¹⁴ Ki mannyer limanite pou ganny libere avek lenperfeksyon? Zeova in etabli en Rwayonn dan lesyel e bann ki pou dirize i “derynen Adan” e sa 144,000 Kretyen swazir. (**Lir Revelasyon 5: 9, 10.**) Bann ki pou avek Zezi dan lesyel pou’n deza eksperyans lenperfeksyon. Pandan sa mil an ki zot pou renny ansann, zot pou ed bann lo later pour sir-mont lenperfeksyon ki zot pa’n kapab arive fer lo zot menm.—Rev. 20:6.

¹⁵ A lafen sa renny mil an, bann imen obeisan pou’n ganny libere avek tou zot bann lennmi ki dezobeisans Adan in anmennen. Labib i dir: “Parey tou dimoun i mor dan Adan, demenn dan Kris tou pou reviv. Me sakenn dan son ran, Kris premye parmi tou, e ler i vini, tou sa bann ki pou Kris [bann ki pou renny avek li]. Apre sa, lafen tou keksoz pou arive, ler i pou remet Rwayonn

13. Ki mannyer “derynen Adan” pou azir pour ed bann mor?

14. Ki provizyon Zeova in fer pour ranvers lenperfeksyon ki Adan in pas avek son desandans?

15, 16. (a) Kisisa sa ‘derynen lennmi lanmor’ e kan ki i pou ganny detri? (b) Dapre 1 Korentyen 15:28, ki Zezi ek son bann asosye ki pou renny avek li pou fer?

Abel, premye dimoun pour mor,
pou benefisye atraver sakrifis Zezi
(Vwar paragaf 13)



dan lanmen Bondye, son Papa, apre ki i'n detri tou lotorite, pouvwat spirityel ek tou pisans. Parski fodre ki Kris i rennyen ziska ki i'n met tou son lennmi anba son lipye. Dernyen lennmi ki pou ganny detri, se lanmor." (1 Kor. 15:22-26) Wi, pese ki nou'n erite avek Adan pou ganny detri. "Sa vwal dey" ki anvlop limanite pou'n ganny tire pour touzour.—Iza. 25:7, 8.

¹⁶ Zapot Pol i konklir son liv enspire avek sa parol: "Kan tou keksoz in ganny soumet avek Kris, alor Garson limenm, i a soumet son lekor avek sa enn ki'n soumet tou keksoz avek li, e alor Bondye i ava tou pour tou dimoun." (1 Kor. 15:28) Plan renny Garson Bondye pou'n ganny akonpli. Apre, avek lazwa i pou rann Zeova son Rwayonm e prezant fanmir imen ki pou'n vin parfe avek li.

¹⁷ Me ki pou arive avek Satan, sa enn ki'n fer limanite pas atraver tou sa bann

17. Finalman, ki pou arive avek Satan?

maler? Revelasyon 20:7-15 i donn nou larepons. Dan en tes final, Satan pou ganny permet pour esey anbet bann imen parfe. Dyab ek bann ki swiv li pou ganny eliminen pour touzour dan "dezyenm lanmor." (Rev. 21:8) Sa lanmor pa pou zanmen "ganny detri" akoz bann ki eksperyans sa "dezyenm lanmor" pa pou zanmen viv ankor. Par kont, "dezyenm lanmor" pa en lennmi pour bann imen ki kontan e servi zot Kreater.

¹⁸ Apre bann imen parfe ki pou ganny laprouvasyon Zeova pou ganny lavi eternal san okenn lennmi. Sa travay ki Adan ti'n gannyen pou'n ganny akonplir san li. Later pou ranpli avek son desandans ki pou vwar li en plezir pour pran swen avek later ek tou sort kalite zannimo. Annou pa zanmen perdi lapresyasyon pour lafason ki Zeova pou detri sa dernyen lennmi, lanmor!

18. Ki mannyer sa travay ki Bondye ti donn Adan pou ganny akonplir?



Rapel bann dan servis a plen tan

“Nou rapel . . . ki manner zot in pratik zot lafwa e akonpli en travay lanmour.”—1 TESA. 1:3.

KI OU POU REPONN?

Ki serten form servis ki ti annan dan premye syek e ki manner bann ki ti pe servi dan sa fason ti ganny ede finansyerman?

Ki form servis a plen tan ou apresye dan nou letan?

Ki manner ou kapab ed en dimoun ki dan servis a plen tan?

ZAPOT Pol ti rapel bann ki ti travay dir pour sa bon nouvel. Pol ti ekrir: “Nou rapel devan nou Bondye e Papa, ki manner zot in pratik zot lafwa e akonpli en travay lanmour an restan ferm dan lesperans dan nou Senyer Zezi.” (1 Tesa. 1:3) Byensir, Zeova li menm i rapel tou bann ki servi li fidelman avek lanmour, ki swa zot sirkonstans lavi i permet zot fer en kanti-te oubyen en ptigin.—Ebr. 6:10.

² Bokou nou bann frer ek ser ozordi e dan lepase in fer bann gran sakrifis pour servi Zeova a plen tan. Annou vwar ki manner serten ti servi Zeova dan premye syek. Nou pou osi diskite serten form servis a plen tan dan nou letan e vwar ki manner nou kapab rapel sa bann ki’n pare pour servi dan sa bann fason spesyal.

BANN KRETYEN DAN PREMYE SYEK

³ Pa bokou letan apre ki Zezi ti’n batize, i ti konmans en travay ki ti pou ganny fer dan lemonn antye. (Lik 3:21-23; 4:14, 15, 43) Apre ki i ti’n mor, son bann zapot ti pran linisyativ

1. Ki ti santiman Pol konsernan bann ki travay dir pour servi Zeova?
2. Ki nou pou diskite dan sa lartik?
- 3, 4. (a) Ki manner serten ti servi Zeova dan premye syek? (b) Ki manner zot bann bezwen de baz ti ganny pran swen avek?

pour sa travay predikasyon ki ti pe kontinyen progresse. (Akt 5:42; 6:7) Serten Kretyen, par egzanzp Filip, ti servi konman evanzelizater ek misyonner Pales-tin. (Akt 8:5, 40; 21:8) Kant a Pol ek lezot zot ti vwayaz pli lwen. (Akt 13:2-4; 14:26; 2 Kor. 1:19) Serten, parey Silven (Silas), Mark ek Lik ti osi servi konman sekreter oubyen ekriyen. (1 Pyer 5:12) Bann ser Kretyen ti travay ansanm avek sa bann frer fidel. (Akt 18:26; Rom. 16:1, 2) Leksperyans tou sa bann frer ek ser i eksitan e sa i fer li en plezir pour lir Lekritir Grek Kretyen ki montre nou ki Zeova i rapel son bann serviter e i apresye zot.

⁴ Ki mannyer bann serviter a plen tan dan premye syek ti siport zot lekor finansyerman? Par ler, bann frer ek ser Kretyen ti demontre lospitalite anver zot oubyen zot ti ganny ede dan lezot fason, me san ki zot ti bezwen demann sa led. (1 Kor. 9:11-15) Serten dimoun e osi bann kongregasyon ti volonterman donn zot sipor. (**Lir Akt 16:14, 15; Fili-pyen 4:15-18.**) Pol ek bann ki ti vwayaz avek li ti osi travay a mitan pour ede kou-ver zot bann depans.

BANN SERVITER A PLEN TAN DAN NOU LETAN

⁵ Ozordi osi, bokou i travay dir dan diferan form servis a plen tan. (Vwar sa bwat "Diferan form servis a plen tan.") Ki mannyer zot santi konsernan sa karyer ki zot in swazir? Sa i en kestyon ki ou kapab demann zot e tre probab ou pou ganny ankouraze en kantite. Annou vwar en legzanp: En frer ki'n servi konman en pionye ordiner, pionye spesyal, misyonner e en manm lafanmir Betel dan en lot pei i dir: "Mon santi ki pran servis a plen tan i enn parmi sa pli bon

5. Ki mannyer en koup i santi konsernan zot lavi dan servis a plen tan?

swa ki mon'n deza fer. Ler mon ti annan 18 an, mon ti vwar li difisil pour decide si mon pou al liniversite, pran en karyer a plen tan oubyen servis pionye. Mon leksperyans in montre mwan ki Zeova pa oubliy bann sakrifis ki ou fer pour servi li a plen tan. Mon'n kapab servi nenport talan oubyen abilite ki Zeova in donn mwan dan bann fason ki pa ti pou'n posibil si mon ti'n swazir en karyer dan sa le-monn." Son madanm i dir: "Tou sa bann responsabilite in ed mwan pour devlope. Nou'n toultan santi proteksyon ek gidans Zeova dan bann fason ki pa ti pou'n zanmen arive si nou ti'n zis kontinyen fer sa ki nou santi nou alez pour fer. Mon remersye Zeova tou le zour pour nou lavi dan servis a plen tan." Eski ou ti a kontan annan sa menm santiman?

⁶ Byensir, serten i annan bann sirkons-tans ki pa permet zot pour pran servis a plen tan a sa moman. Nou kapab asire ki Zeova i osi apresye zefor ki zot fer avek tou zot leker. Mazin sa bann ki Pol ti mansyonnen par non dan **Filemon 1-3**, enkli tou bann ki ti form parti kongrega-syon Kolos. (**Lir.**) Pol ti apresye zot e Ze-ova osi. Dan sa menm fason, nou Papa dan lesyel i apresye ou servis. Me ki mannyer ou kapab donn sipor sa bann ki pe servi a plen tan la konmela?

ED BANN PIONYE

⁷ Parey bann evanzelizater dan premye syek, bann pionye devoue i en bon sours lankourazman dan kongregasyon. Bokou i pres pour 70 erdtan sak mwan. Ki mannyer ou kapab ed zot?

⁸ Shari, en ser pionye ti fer sa remark: "Bann pionye i paret for vi ki zot dan

6. Ki nou tou nou devret asire konsernan santiman Zeova?

7, 8. Ki servis pionye i enplike e ki mannyer le-zot dan kongregasyon i kapab ed bann pionye?

Diferan form servis a plen tan



Pionye ordiner i pres pour 70 erdtan sak mwan, zot servi dan zot kongregasyon oubyen dan bann landrwa kot i annan plis bezwen.



Pionye spesyal i pres pour 130 erdtan sak mwan, souvandfwa zot ganny anvoye dan bann landrwa kot i annan plis bezwen.



Sirveyan rezyonal i servi en serten kantite kongregasyon, zot diriz predikasyon e ed bann kongregasyon dan lezot fason.



Manm lafanmir Betel i servi dan en biro brans oubyen en biro tradiksyon pour ede prodwir bann piblikasyon oubyen gid bann pei ki biro brans i pran swen avek.



Misyonner i ganny anvoye dan bann pei etranze. Bokou misyonner i pres pour 130 erdtan sak mwan.



Serviter enternasyonal ek volonter i al dan bann diferan pei pour ede konstri bann biro brans, biro tradiksyon, Lasal Lasanble ek Lasal Rwayonm.



Serviter konstriksyon Lasal Rwayonm i ganny formen pour konstri bann Lasal Rwayonm e ede avek lezot konstriksyon nesese dan zot pei.

servis tou le zour. Kantmenm sa, zot bezwen lankourazman.” (Rom. 1:11, 12) En lot ser ki ti nobou fer pionye pour plizyer lannen ti dir sa konsernan bann pionye dan son kongregasyon: “Zot toultan pe travay e zot travay dir. Kan lezot i ofer pour pran zot transpor pour anmenn zot dan predikasyon, envit zot pour en repa,

donn zot en pti larzan bennzin oubyen ed zot dan lezot fason finansyerman, zot vreman rekonesan. Sa i montre zot ki ou vreman entereze.”

⁹ Eski ou ti a kontan ed bann pionye dan predikasyon? En pionye ki apel Bobbi ti sipliye: “Nou bezwen plis sipor pandan lasemenn.” En lot pionye dan sa menm kongregasyon ti azoute: “I difisil pour ganny en dimoun pour al avek ou dan predikasyon dan apremidi.” En ser ki aprezan pe servi dan Betel Brooklyn i dir sa avek lazwa konsernan son servis pionye: “En ser ki ti annan loto ti dir, ‘Nenport ler ki ou napa personn pour al avek ou dan predikasyon, telefonn mwan e mon ava al avek ou.’ I ti ed mon kontinyen dan mon servis pionye.” Shari i fer sa remark: “Apre predikasyon, souvandfwa bann pionye selibater i tousel. Petet ou kapab envit bann frer oubyen ser selibater pour asiste ou Ladorasyon Fanmir detanzantan. Kan ou osi enkli zot dan lezot aktivite sa i ede pour gard zot for.”

¹⁰ En ser ki’n fer servis a plen tan pour preski 50 an, i mazin son servis pionye avek lezot ser selibater e dir: “Nou bann ansyen ti vizit bann pionye tou le detrwa mwan. Zot ti demann nou konsernan nou lasante, nou lanplwa e si nou ti annan okenn keksoz ki ti pe trakas nou. Zot ti vreman senser. Zot ti vizit nou flat pour zot kapab vwar si nou ti bezwen okenn led.” Sa i kapab fer ou rapel lapresyasyon Pol pour servis ki en perdfanmir Efez ti rann li.—2 Tim. 1:18.

¹¹ I en benediksyon pour bann kongregasyon annan bann pionye spesyal. Bokou sa bann frer ek ser i pres pour 130 erdtan sak mwan. Vi ki zot pas sa kantite

9, 10. Ki serten in fer pour ed bann pionye dan zot kongregasyon?

11. Ki servis pionye spesyal i enplike?

letan dan predikasyon e ede dan lezot fason, sa i fer ki zot pa travay bokou oubyen menm pa travay ditou. Biro brans i donn zot en pti larzan sak mwan pour ki zot kapab konsantre lo zot minister.

¹² Ki mannyer nou kapab ed bann pionye spesyal? En ansyen ki travay dan en biro brans e ki souvan ganny kontak avek bann pionye spesyal i eksplike: “Bann ansyen i bezwen koz avek zot, konn zot sirkonstans e apre rode ki mannyer zot kapab ed zot. Serten Temwen i prezimen ki bann pionye spesyal i ganny tou sa ki zot bezwen aköz zot ganny en pti larzan sak mwan, me bann frer ek ser dan zot kongregasyon i kapab ed zot dan plizyer fason.” Parey bann pionye ordiner, bann pionye spesyal i apresye kan zot ganny dimoun pour travay avek zot dan predikasyon. Eski ou kapab ede dan sa fason?

ED BANN SIRVEYAN KI VIZIT BANN KONGREGASYON

¹³ Souvandfwa bann sirveyan ek zot madanm i ganny konsidere konman bann ki for e stab spirityelman. Sa i vre, me zot osi tou zot bezwen lankourazman, dimoun pour travay avek dan predikasyon e pour ganny enkli dan bann moman detant. Ki i arive si zot tonm malad e bezwen reste lopital, petet aköz zot bezwen fer loperasyon oubyen fizyoterapi? Zot vwar li ankourazan ler bann frer ek ser dan zot kongregasyon i ede avek zot bann bezwen e demontre lentere personnel dan zot. Nou kapab mazin sa swen ki Lik, sa ‘dokter byenneme’ ki ti ekrir sa liv Akt ti’n bezwen demontre an-

12. Ki mannyer bann ansyen ek lezot i kapab ed bann pionye spesyal?

13, 14. (a) Ki nou devret rapel konsernan bann sirveyan rezyonal? (b) Ki ou krwar ou kapab fer pour ed bann ki pe servi konman sirveyan?

ver Pol ek lezot konpanyon ki ti pe vwa-yaz avek li.—Kol. 4:14; Akt 20:5–21:18.

¹⁴ Bann sirveyan ek zot madanm i bezwen e apresye bann bon zanmi. En sirveyan rezyonal ti ekrir: “I paret ki mon bann zanmi i konnen kan mon bezwen lankourazman. Zot demann bann kesyon avek disernman e sa i ed mwan pour koz konsernan sa ki pe trakas mwan. Zis lefet ki zot ekout mwan sa i en gran led.” Bann sirveyan ek zot madanm i vremen apresye sa lentere personnel ki bann frer ek ser i demontre.

DONN SIPOR MANM LAFANMIR BETEL

¹⁵ Dan lemond antye, bann ki servi dan Betel i donn sipor nesaser sa travay predikasyon dan bann pei ki tonm anba zot biro brans. Si i annan bann Betelit dan ou kongregasyon oubyen rezyon, ki mannyer ou kapab montre ki ou rapel zot?

¹⁶ Ler zot fek ariv Betel, zot kapab mank zot fanmir ek bann bon zanmi. Pa zot vremen apresye ler lezot Betelit e lezot dan zot nouvo kongregasyon i vin zanmi avek zot! (Mark 10:29, 30) Zot program travay i permet zot asiste renyon e partisip dan predikasyon sak semenn. Me detanzantan, bann Betelit i kapab annan travay an plis. Ler bann kongregasyon i konpran sa e montre ki zot apresye bann Betelit e sa travay ki zot pe fer, tou dimoun i benefisyè.—**Lir 1 Tesaloni-syen 2:9.**

ED BANN KI DAN SERVIS A PLEN TAN ALETRANZE

¹⁷ Bann ki aksepte en responsabilite pour servi dan en lot pei i kapab bezwen

15, 16. Ki lafanmir Betel i fer e ki mannyer nou kapab siport zot?

17, 18. Ki bann responsabilite bann serviter a plen tan i annan aletranze?

adapte avek bann manze, langaz ek kondisyon ki vreman diferan avek sa ki zot abitye avek. Akoz zot swazir pour aksepte sa bann sanzman ki en defi?

¹⁸ Serten i bann misyonner, ki prensipalman servi dan predikasyon, kot bokou i benefisyè avek zot bon formasyon. Biro brans i fourni bann misyonner avek en landrwa reste e en pti larzan pour kouver depans zot bann bezwen de baz. Lezot ki servi aletranze i ganny anvoye pour servi dan en biro brans oubyen pour ede konstri bann Betel, biro tradiksyon, Lasal Lasanble oubyen Lasal Rwayonm. Zot ganny zot manze, landrwa reste ek lezot servis. Parey manm lafanmir Betel, zot asiste bann renyon e partisip dan predikasyon kot zot reste, alor zot en benediksyon dan plizyer fason.

¹⁹ Ki mannyer ou kapab mazin sa bann ki dan servis a plen tan aletranze? Rapel ki sirtou o konmansman i kapab ki zot pa abitye avek bann manze sa pei. Ou kapab gard sa antet ler ou envit zot pour en repa e demann zot kwa ki zot kontan manze oubyen ki zot ti a kontan manze. Annan pasyans anmezir zot aprann sa langaz ek koutim. I kapab pran en pe letan avan ki zot konpran tou sa ki ou dir, me ou kapab ed zot zantiyman pour pronons bann mo. Zot *anvi* aprann!

²⁰ Anmezir ki letan i pase, bann serviter a plen tan i vyeyi e zot paran osi. Ler bann paran i Temwen, i tre probab ki zot

19. Ki nou devret gard antet konsernan bann ki pe servi dan en pei aletranze?

20. Dan ki bon fason nou kapab rapel bann serviter a plen tan ek zot paran?

anvi ki zot zanfan i reste dan zot servis. (3 Zan 4) Byensir, si zot paran i bezwen swen, bann serviter a plen tan pou fer tou sa ki zot kapab e pou vin ed zot sak fwa ki i posib. Kantmenm sa, bann ki dan zot pei i kapab ed bann ki dan servis a plen tan kan zot pare pour donn swen si bann paran aze i bezwen led. Rapel ki bann serviter a plen tan i annan bann gran responsabilite dan sa travay pli enportan ki lemonn in deza konnen. (Mat. 28:19, 20) Eski ou oubyen ou kongregasyon i kapab donn en koudmen si paran bann serviter a plen tan i bezwen led?

²¹ Bann ki pran servis a plen tan i servi, pa pour benefisyè finansyèman me akoz zot anvi servi Zeova ek lezot. Zot vreman apresye nenport led ki ou kapab donner. En ser ki pe servi aletranze ki annan menm santiman parey lezot i dir: “Menm en pti let pour eksprim lapresyasyon i montre ki lezot pe mazin ou e ki zot kontan sa ki ou pe fer.”

²² Servi Zeova a plen tan i vreman sa pli bon fason viv. I en defi, i ansenny nou e i donn nou satisfaksyon. I osi en bon preparasyon ki pou ed nou fer sa travay ki pou anmenn satisfaksyon pour touzour ki pe esper tou bann serviter fidel Zeova anba Rwayonm Bondye. Annou tou “rapel . . . ki mannyer [bann serviter a plen tan] in pratik zot lafwa e akonpli en travay lanmour.”—1 Tesa. 1:3.

21. Ki mannyer bann ki pe servi a plen tan i santi konsernan led ek lankourazman ki lezot i donner?

22. Ki mannyer ou santi konsernan servis a plen tan?



Ou kapab download sa magazin ek lezot publikasyon ki disponib lo www.jw.org



Ou osi kapab lir *New World Translation* lo sa sit

Al lo www.jw.org ou swa skàn sa kod



w14.09/15-SC
140520